

L'AIVAINTAIDGE DI SAIVOI

È y avait dains ïn coénot
Dous bordgeais que se tchaimâyïnt.
Yun était rétche et peus bugnot,
L'âtre poûere mains tot malïn.
C'tu qu'avait de quoi v'lait môtraie son aivaintaidge :
È sôt'nait que tot hanne saidge
Daivait y tirie son tchaipé.
(I me d'mainde poquoi è farait l'honoraie
Po des sôs qu'èl avait hér'tès !)
« Mon aimi, qu'è diait s'vent è son sciënçou véjïn,
Vôs se prentes po ïn môssieu,
Mains vôs èz prou fâte de pain.
Chu vot'tâle, djanmais de tçhnieû !
Vôs êtes tôdj'dains vos yéjures,
Et vôs demoérèz dôs les toéts.
Vôs poétchèz lai meinme vétüre
Dâs lai Teûssaint djaunqu'en djuyèt.
Not'paiyis n'é p'fâte de dgens
Dépnâyous, que n'dépeinsant ran.
I crais brâment utiye de tchaimpaie ses sôs :
Ç'ât c'qu'i aï lou piaïji de faire bïn des côps
Dâli i enrétchâs l'ôvrie et lou vendou.
I peus sôt'ni les aimeûnous
Ïnchtruts, que m'aidrassant praiyiere
Po yos métchaints yivres marlières ! »
C'tu que se retendait d'innai
É cognu l'soûe qu'è méritait.
Lou sciënçou l'ouëyait se bragaie,
Èl é léchie lou temps péssaie.
Lai dyierre ât v'ni dains lai contrèe,
Lou yûe ât aivu décombrè.
Nos dous bordgeais aint fu lai vèlle :
Lou saivaint é trovè tchaince novèlle
Di temps que lou teûné n'avait piepe è maindgie
Èl était r'boussè d'tot poitchot.
Djâse se te veus, cré dobot
Lou saivoi é tôdje son prie !



D'après Jean de La Fontaine